



JABATAN MUFTI NEGERI PERAK

بِسْمِ اللَّهِ الرَّحْمَنِ الرَّحِيمِ

KENYATAAN RASMI BIL. 12/2019

**MEMPERKASA EKONOMI UMAT ISLAM  
DENGAN MENGUTAMAKAN PRODUK MUSLIM**

1. Firman Allah SWT dalam surah al-Baqarah ayat 172:

يَا أَيُّهَا الَّذِينَ آمَنُوا كُلُوا مِنْ طَيِّبَاتِ مَا رَزَقْنَاكُمْ وَاشْكُرُوا لِلَّهِ إِنْ كُنْتُمْ إِيَّاهُ تَعْبُدُونَ

*'Wahai orang-orang yang beriman! Makanlah dari benda-benda yang baik (yang halal) yang telah Kami berikan kepada kamu, dan bersyukurlah kepada Allah, jika kamu hanya beribadat kepadanya.'*

Ayat ini memerintah umat Islam supaya memakan makanan yang baik-baik dan bersyukur di atas kurniaan Allah SWT sekiranya umat Islam benar-benar mengabdikan diri dan menyembah Allah semata-mata.

2. Agama Islam menuntut umatnya untuk berusaha memperkasa ekonomi sendiri dengan mengeluarkan dan membekalkan produk buatan kita sendiri. Hal yang demikian adalah disebabkan umat Islam mengetahui hukum-hukum dan prinsip-prinsip penyediaan sesuatu produk tersebut. Dalam masa yang sama Islam tidak menafikan hak dan penglibatan orang bukan Islam dalam berjual-beli dengan syarat mematuhi hukum dan etika pengeluaran sesuatu produk. Malah asas kepada urusan jual beli yang dititikberatkan dalam Islam adalah unsur saling meredhai (*taradhin*).
3. Konsep ta'awun atau tolong-menolong merupakan perkara asas dalam agama Islam termasuklah dalam jual beli. Konsep ini mempunyai kebaikan dan falsafah tersendiri dalam membangunkan serta menjaga kepentingan ekonomi umat Islam. Kempen 'Buy Muslim First' (BMF) yang diketengahkan dalam masyarakat negara ini adalah implementasi daripada konsep ta'awun yang bertujuan memperkasa ekonomi umat Islam di negara ini. Adalah menjadi keutamaan kepada umat Islam untuk mendaulatkan segala perintah al-Quran dan al-Hadith dalam segenap aspek kehidupan termasuklah aktiviti jual-beli dan dikira sebagai mujahadah dan ibadah di sisi Allah SWT. Konsep ini sejajar dengan ayat 2 surah al-Ma'idah yang bermaksud: *"Dan bertolong-menolonglah kamu dalam perkara kebaikan dan taqwa..."*
4. Umum mengetahui bahawa kekuatan sesuatu bangsa adalah dipengaruhi oleh kekuatan ekonominya. Sebagai umat Islam kekuatan akidahlah yang akan mempengaruhi kekuatan ekonomi kita. Seorang Islam yang kuat akidahnya akan memperkuat ekonominya dengan memastikan rantai produk mestilah bersumberkan yang halal dan *thoyyib*. *Thoyyib* merujuk kepada perkara-perkara kebaikan yang ada pada produk tersebut meliputi sumber-sumber bahan mentah dan kaedah-kaedah penyediaan produk tersebut termasuklah pekerja yang bersih serta mempunyai hati yang ikhlas dan jujur.
5. Maka dengan ini saya menyeru seluruh umat Islam di negara ini agar bersama-sama menjayakan agenda memperkasakan ekonomi umat Islam dengan berusaha bersungguh-sungguh membeli dan menyokong produk Muslim. Marilah kita merealisasikan perintah Allah tersebut supaya kita semua dilimpahi naungan rahmat dan kasih sayang-Nya.

**Tan Sri Dato' Seri (Dr.) Haji Harussani Bin Haji Zakaria**  
Mufti Negeri Perak Darul Ridzuan

10 Muharram 1441 H (Selasa)  
10 September 2019 M